

ESCASSO MOUN PEIRIN

NICOLAU LASSERRE

POURTISSOUN

Longtèms, pèr nautre, Nicoulau Lasserre èro esta lou meïour disèire di fablo de Bigot. Acò sufisié à nous lou faire ama. L'escoutavian pèr plesi, e l'aurian alassa, se l'ome èro esta alassable.

— Encaro uno! èro lou crid de tóuti, quouro acabavo de dire la mouralo sèmpre ouriginalo e mourdènto que Bigot metié à si fablo imitado, pèr lou founs soulamen, de La Fontaine.

Mai, sauprés que Lasserre èro pas qu'un disèire, e nous sousprengùè, un bèu jour, de vèire que manejava la plumo éu tambèn em'uno vèrbio touto siéuno, adaut, à Paris ounte li varai d'uno vido touto de travai, e de travai li mai divers, l'avien adu. E nous faguè grand gau d'aprene que li Miejournalou dóu Cafè Voltaire se regalavon souvènt de si prouducioun en lengo d'O: Bigot, pèço en dous ate; La Diveto e lou Rachalan, galejado en un ate; Vivo lou vin, un ate; La noço dóu Nebout, un ate; Uno afairo embouïado, vaudevilo en un ate; Lou Vergougous, coumèdi en tres ate; Lou Secrèt, dramo en tres ate; e d'àutris encaro.

Plus tard, quouro fuguè tourna en Aigo-Morto ounte èro nascu lou 21 de mai 1862, emé la retreto de Countourroulaire di fraudo e noun sai quant de medaïo à sa poulacro, nous faguè uno nouvello sous presso en se revelant istourian de proumiero emé soun Histoire d'Aigues-Vives pareigudo en 1919: travai seriousamen establi sus de paciènti recerco dins lis archiéu dóu Gard e de l'Erau, que i'avien adeja permés de faire à la Soucieta d'Istòri e d'Arqueoulougìo de Nimes de counferènci autamen presado sus Aigo-Morto, sus, lou Vidourle, sus la Questioun religiouso, etc.

Un bon disèire pòu faire qu'un bon counferencié, e se n'avisèron à la Soucieta d'Estùdi Taurin, à la Tour Magno e aiours.

Quau aurié dich acò dóu boujarroun qu'à 11 an quitavo l'escolo coumunalo di Fraire dis Escolo Crestiano pèr ana gagna sa vido emé li maçoun coume manobro, d'abord, emé li vigneïroun coume oubrié agricole, pièi, e coume daiaire de palun, avans de deveni... clergue de noutàri! Ero dins uno equipo d'engeniaire e d'ouperatour carga d'establi l'avans-proujèt d'agrandimen dóu canau de Bèucaire à Seto, quouro s'engagè pèr cinq an dins l'Artiharié de Marino. Avié pas vint an e deja soun curriculum vitae, coume dison, mancavo pas d'ourignaleta.

Incourpoura à Lorient, fuguè gaire après manda à Touloun ounte passe bregadié e souto-ouficié. Mai, s'èro pas fa matalot pèr resta sus terro, e fugue voulountàri, en 1883, pèr ana au Tonkin. Desbarca à Haiphong e nouma porto-fanioun dóu generau Borgnio-Desbordes, partecipè à la preso de Bach-Ninh e de Song-Thai.

Après sièis mes de Couchinchino ounte l'avien delega coume marescau-di-lougis capo-coumtable d'un destacamen de coundutour à Saïgon, partiguè coume ajudant em'uno coulouno qu'anavo oupera au Cambodge ounte veguè li famous temple d'AngKor. Demourè très an dins aquéu païs mau-san avans de rintra en Franço, libera.

Tourna dins la vido civilo, n'en fugué pas tout d'uno au pan blanc, emai aguèsse liga soun destin emé la douço e tëndro femo que s'èro chausido despièi longtèms, e que ié dounè lèu dous enfant. Fuguè à-derèng coumtable, vouiajour, founda de poudé en Argié d'un oustau de vin que faguè quinquinello, tournamai coumtable, entounaire e representant, enjusqu'au moumen que la Counferacioun di Vigneiroun, après lis evenimen de 1907, lou mandè dins li païs dóu Nord pèr faire la casso is arcandié que fraudavon li vin dóu Miejour.

Falié-ti que fuguèsse bouleguiéu, aquéu Lasserre! Pensas qu'avans de s'ana establi à Paris pèr miés pousqué surviha li despartamen que la Counfederacioun i'avié fisa, dóu Havre fin qu'à Reims, s'èro oucupa de poulitico e èro esta candidat soucialisto à la deputacioun, avié crea un Group d'estudi souciau e uno Couralo oubrieno, avié founda un Sendicat de Defènso Viticolo e uno Caisso loucalo de Credit agricole, e de-que sabe encaro — sènso qu'acò, ai-las! i'aguèsse douna d'autro satisfacioun que de faire soun devé, car la recouneissènço dóu pople vai raramen a quau se la merito; bèn countènt encaro se lis oubrié, travaia pèr la bourgeoisò, sospichon pas lou que fai tout pèr éli.

Basto! Un cop à Paris, tout à sa delicato messiou, poudié se crèire enfin au bout de si treboulèri, meme quouro la castagno petè en 1914, car si 52 an bèn souna lou metien à l'abri de touto requisicioun. Mai, aurié pas faugu agué soun sang, pèr acò. Lasserre pousqué pas vèire soun nebout, soulet enfant escapa di vue qu'avié agu soun fraire, tounba dins li proumié de la guerro, e lou XVe Cors acusa oudiousamen de lacheta, sènso senti boumbi soun cor coume sout un copde saupetro. Lou 8 de Setèmbre 1914 s'engajè coume simple sourdat au 54e Regiment d'Artiharié de campagno à Lioun, ounte un Coumandant lou remetequè dins soun ancian grade. Quàquui mes plus tard èro sus lou front e fasié founcioun d'ouficié dins uno seicioun de municiou. Nouma sout-liotenènt, demandè à passa dins uno batarié de tir e passé au 2e Regiment d'Artiharié. Varié à l'entour de Verdun, e s'atrouvavo toucant Chattancourt quouro aguè li pèd jala.

L'evacuèron sus l'espitau de Troyes, pièi sus aquéu de Limoge, d'ounte tre que fuguè gari tournè à soun Depost de Grenoble e se faguè muta au 19e R. A. à Nime. Acò èro au debut de 1918. E sabès ço que faguè à Nime? Creè un jardin poutagié de tres eitaro à la Farello e menè, de mita emé lou grangié, setanto eitaro de bèn. Ajudè talamen l'Intendènci, ansin, que li Menistre de l'Agriculturo e de la Guerro ié mandèron de felicitacioun.

Demobilisa en Mars 1919, reprenguè si founcioun de countourroulaire di fraudo.

E poudès vous crèire que countourroulavo! Se viéu encano, se n'en dèu souveni lou que faguè coundana à trento-dous milioun d'amendo, en 1922. Es alor que s'istalè à Paris, dins un service pas trop carga, e que trevè li soucieta de Miejournal ounte devié faire mirando: la Brandado, li Dina Frissant, lis Ami de la Lengo d'O, etc. Un tèms, fuguè amenistratour dou Teatre Prouvençau que, se fuguè de courto vido, es pas éu que n'en fuguè l'encauso... Pièi, sounè l'ouro de la retreto e dou retour au païs.

Avèn di lou gènre de repaus que Mèstre Nicoulau a pres en Aigo-Morto. I'a d'ome pèr quau lou mot de retreto a ges de significacioun. Es lou cas de Lasserre, qu'en mai de soun travai de reclassamen dis Archiéu de la ciéuta-aigo-mourtenco e de soun obro literàri, a fa provo d'uno remarcablo ativeta, de setèmbre 1939 au mes d'òutobre de 1940, coume secretàri-coumtable de la Coumessioun dóu Ravitaïamen, e, de 1940 à 1942 coume... mèstre d'escolo: ensignavo lou prouvençau i drouloun e droulouno d'Aigo-Morto.

Eh! bèn, de que n'en disès? Cresèn pas que n'en couneiguès forço coume aquéu. Aquéli que l'an vist à Maiano, lou 8 de Setèmbre de 1945, ravi maugrat si 83 an, e que l'an entendu dine l'Invoucacioun de Calendau davans la toumbo dóu Mèstre, l'oublidaran pas de tant lèu. Ah! qu'èro urous! Ero mai fièr d'acò que de si medaio e de si crous; car es chivalié de l'Ordre reiau dóu Cambodge (1884), medaia dóu Tounkin (1885), ouficié d'Acadèmi (1898), óuficié dóu Merite Agricole (1923) e Chivalié de la Legioun d'Ounour emé dos citacioun, à l'ordre de la Divisioun (1916) e à l'ordre de l'Armado (1917).

Sian segur que ié pourtas estimo, aro que couneissès sa vido, sa bello vido. Sian segur que l'amarés, quouro aurés legi Escasso moun peirin ounte a mes, pèr parla de soun rèire-grand, tout soun cor e touto soun amo.

Marius JOUVEAU.